

## Optužnica protiv 12 članova terorističke grupe

Tužilaštvo BiH podiglo je optužnicu protiv 12 državljana BiH koji se terete da su, kao članovi organizirane terorističke skupine, protuzakonito sudjelovali u oružanim sukobima u Siriji i Iraku. Optuženi su: Fatih Hasanović, zvani Ebu Sara (24), Enes Mešić (28), Jasmin Jašarević, zvani Ebu Rewaha i Japa (28), Emin Hodžić (23), Mirza Kapić (35), Salko Imamović (29), Adem Karamuja (26), Fikret Hadžić (58), Enver Lilić (38), Ibro Delić (44), Samir Hadžalić (29) i Mehmed Tutmić (57).



Oni su krajem prošle godine uhapšeni u akciji Damask, koja se provodila na širem području BiH. Prema optužnici, terete se da su 2013. i 2014. godine, kao pripadnici tzv. selefijske zajednice u BiH organizirane izvan zvaničnih institucija Islamske zajednice BiH, u nekoliko mjesta prihvatili radikalnu ideologiju Islamske države organizovane u Siriji i Iraku. U tom periodu, oni su napustili BiH s ciljem priključenja organizacijama koje su od Vijeća Sigurnosti UN-a proglašene kao terorističke skupine. Terete se da su u dogovoru sa njima poznatim osobama, odlazili u Tursku, odakle su ilegalno prelazili u Siriju, gdje su boravili po nekoliko mjeseci, sudjelujući u terorističkim aktivnostima.

Iz Tužilaštva BiH su saopštili da su proveli višemjesečnu, detaljnu istragu, suradujući sa svim partnerskim agencijama u borbi protiv terorizma iz BiH, ali i svijeta. Tokom istrage, pretreseni su objekti koje su koristili osumnjičeni i pronađeni su: oružje, bombe i specijalistička vojna oprema, čije držanje ni pod kojim uvjetima nisu dozvoljeni civilima. Kako je najavljeno, Tužilaštvo BiH će odgovornost optuženih dokazivati pozivanjem 25 svjedoka i stručnih vještaka na suđenje. Optužnica će biti prosljeđena Sudu BiH.

Fatih Hasanović se nalazi u pritvoru, nakon što je prihvaćen prijedlog Tužilaštva o određivanju jednomjesečnog pritvora. Sumnjiči se da je vrbovao one, koji se dovode u vezu sa napadom na Policijsku stanicu u Zvomiku, u kojem je Nerdin Ibrić ubio policajca Dragana Đurića i ranio dvojicu njegovih kolega. Navodno se intenzivno družio sa Ibrićem. Sumnjiči se i da je tokom 2013. godine ratovao u Siriji.

Mediji su pisali da je Enes Mešić jedan od najagresivnijih pripadnika vebahijske zajednice u selu Dubnica kod Kalesije. Početkom 2013. optužen je za zlostavljanje supruge Amele B. (21), za teške povrede ženskih spolnih organa. Sud BiH je krajem 2014. donio rješenje kojim je ukinuo pritvor i odredio mjere zabrane ostalim uhapšenima. Oni su od tada dobili obavezu da se redovno javljaju u policijske stanice.

**E. GODINJAK**